




# Baabba Doongite Ceekkatite Ilamishshi Dhagge

Leveled



Sidaamu Afoo



Kuni irkisaanchu maxaafi ‘USAID’inni afi’nonni woxu irkonni  
‘Save the Children’i, Rosu Ministerenna Wodiidi Daga  
Dagoominna Manni Qoqqowu Mangiste Rosu Biiro mittimmate  
sumiimmenni qixxaawe attamamino.

2009 M.D



**USAID**  
FROM THE AMERICAN PEOPLE



**Save the Children**



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.


For more info please refer: <https://creativecommons.org/licenses/>



# Baabba Doongite Ceekkatite Ilamishshi Dhagge

Kifile 4

Lamala 29




## Qaagiishsha

Aante shiqqino niwaawe (dhagge) illachishshannohu nabbawate huwato aanaati. Niwaawete albaanninna gedensaanni noo xa'mo dawartannota xawisatenni niwaawete mereero shiimare taxxi yitanni nabbabbinore xaphi assidhanno gede kaayyo uyiyyensa. Rosaano niwaawe nabbawate albaanni konni albaanni affinore kultanno gede xa'matenni jawaachishshensa. Konni garinni rosaanonnita niwaawe nabbawate hasatto kakkayissinihu gedensaanni niwaawe nabbawa hananfona. Rosaano irkissinanni baali, xa'muwa dawarate rosaano baala beeqqo assitanno gede jawaachishshensa. Uytanno dawarono haadhinanni taashshi'ri-tumo uyiyyensa.

### Nabbawate Albiidi Xa'mo

1. Tini dhagge Baabba Doongitere maricho odeessitannonkeha lawannohe?
2. Ilamishshu dhagge yinanniti hiittoo dhaggeeti?
3. Baabba Doongite Ceekkatiti roso rossinotanso rossinokkita labbannohe?



## Gafa Mite

### Baabba Doongite Ceekkatiti Ilantino Darganna Yanna

Tini Baabba Doongite ilamishshi dhaggeeti. Dhaggeseno aane noo garinni shiqqino. Baabba Doongite Ceekkato yinannise. Baabba Doongite anni Kalaa Ceekkata Cennoho. Amase Baabba Baxise Yonnorite. Annise Kalaa Ceekkati Nugusu Hayle Sillaase Gashshooti yannara olliinsara uyinanni roso sase kifile geeshsha rosino. Hattenne yannara roso gude ha’runse rosikinni doogote mure agurino.

Amase Baabba Baxise isinni co'ontanni rosu minira dikaxxitino. Baabba Baxise rosu kaayyo horontanni diafidhino.

Baabba Doongite Ceekkatiti ilantinohu minensa gadadu nookkiha qawaaxxotenni beldeeqqino yanna giddooti. Baabba Doongite ilantanno yannara annise lala daddalaanchooti. Kalaa ceekkatii jawaata daddalaanchooti Lala Naaramo Deelinni hidhe Lakko masse qole hi'ranno. Lakkote hiramikki gatiha Baleelu dikko haa're fushshanno. Kalaa Ceekkatii lala daddalaancho ikkirono gatesi loosi'ra dideanno. Laloosi dadda'lanni hee'renni gatesino garunni loosi'ranno.

Gatesino dancha gede asse amaxxino. Amase Baabba Baxise daddaloho fula hoogguro nafa mininna gatu loosira uffii qocci yitannoti iseeti. Mine saadanna ooso hudidhannokkinna jaabbannokki gede assitanno sharro maala'linannite. Gatu dubbannokkinna shotannokki gede yanna yanna agarte ise loosiissanno. Anniseno amaseno daafurte fushshitino jironni Baabba Doongite qawwaaxxidhe lophitino.

Baabba Doongite ilantinohu Nugusu Hayle Sillaase  
Gashshooti uwate mittu diri callu gate hee'reennaati.  
Togo yaano Itophiyu Diru Kiiro garinni 1965 Maarote  
Dirooti.

Baabba Doongite Ilantino dargino Fuuri Ollii giddooti.  
Hattenne yannara ilantino ollirano ikko qarqaraho  
rosino yinanni manna hanse dianfanni yannaati. Hatti  
yanna lowo manni rosinota di"ikkitino.

Baabba Doongite ceekkatiti anjesenni heedhe lowo  
geeshsha xiinxallate. Annise ceekkati ikke uffi qocci  
yaannota baala la'anni lophitino. Doongite annise  
soqqiwa burri yite soqqantanno. Amase Baxiseno  
lowo geeshsha owaattanno. Doongite qachinsa  
qaaquulli ledono lowo geeshsha baxantanno.


Baabba Doongite Ceekkatiti qachise qaaquulli  
ledo godo'litanni lophitu. Doongitera goowu noowa  
godowu shiqqi yaanni ha'ri. Baabba Doongite  
la'annohu rosino manni dino. Ikkollana, Baabba  
Doongite rosu mine marate lowo gooddo ikkannoseri

dino. Annise Kalaa Ceekkati roso ha'runse rosa  
hoogasinni laala noosiho. Kalaa ceekkati isi rosa  
hoogi gede oososino rosa hooggara dihasi'ranno.

Amase hedono kawiinni dibaxxitinote. Annise kalaa  
ceekkatinte gede amase Baabba Baxiseno rosoho  
addinta Qaaqqose Doongite roso rosse iillitanno  
deerra halchitanni keeshshitino. Konni kaiminni  
Baabba Doongite roso rosate kaayyo afi'rate dancha  
safo afidhino

Baabba Doongite buhise rosoho iillita Lakkote  
Umi Dirimi Rosi Mine e'e roso hanaffu. Baabba  
Doongite rosu minira e'anno yannara buhise lamala  
dirooti. Hakka geeshsha nafu annisenna amase  
quqquxantanni iillitino. Ise amaseranna annisera  
ilate sooreettete. Ise aana ilaminohu maa'nu rodiise  
rosu minira eate iillinokki daafira hadhannohunna  
higgannohu callichoseeti. Maatesenna qachu  
manni kayinni Doongite edderantannokki gede ille  
worte agartannosehura rosisera lowo mitiimma  
dikalaqantinose.





## Gafa Lame

### Baabba Doongite Ceekkatiti Umi Dirimi Rosi Mine

Baabba Doongite rosu minira e'ino hu Itophiyu Diru Kiiro Garinni 1972 Maarote Dirooti. Baabba Doongite rosu minira hadhanno woite doogo callichu hodhitannohura callimma yortuse. Jalla assidhe ledi hadhanno ooso seenuno labballuno dino. Konni daafira rosu minira hadhanno woite shiqqi assannose manni hasiisannose.

Doongite rosu minira geegiissannohu wolu manni mine dino. Wolu bayruuddu geegiissitannose. Soodo hadhanno woyte mito mito woyte Annise Lakko quchumu qacce geeshsha shiqqi assannose. Mito mito woyte kayinni amase geegiissitannose. Sa'e sa'e lamunku mitii'mitino woyte kayinni callichose hadhanno. Barra higganno woyte aye woyteno callichosella dagganno.

Baabba Doongite kaimu balloote waajjiturono gedenoonni rossanni, rossanni hadhuti waajja agurtanni daggu. Rosu mine noo rosaano ledono egennantanni hadhu. Doogote sa'e sa'e heedhanno rosaano ledono jaalooma kalaqidhe boode boode doogo insa ledi ha'ra hanaffu. Hakkuri jaallase ledi boohaartanni ha'rasenni callimma maacciishshama agurtanni daggusse. Baabba Doongite anjesenni heedhe ledi hadhannohu nafa hoogiro wodana shashshe diegentino.

Baabba Doongite ceekkatiti giddose lowo geeshsha kajjado ikkitinohura calla ha'rasenna higase rosose jawatte rossannokki gede diassitinose.

Baabba Doongite konni garinni hadhanni heedhe rosose danchu garinni xiinxabbanno. Rosoho laala noose anniseno mine dagguro nabbabbanno gede jawaachishannose. Kalaa ceekkati nabbawisiise dandaa hoogiro nafa Doongite nabbabbanno gede assannose. Amase Baabba Baxise looso batissannosekki gedeno illaallisannose. Baabba Baxiseno qaaqqose Doongite rosose xiinxawate aana illachishshanno gedella assitannose.

Baabba Doongite mini looso yannate loossanno. Loossanno loosirano lowo so'ro diheedhannose. Kifilete uynanni loosono gudde fixxisiisi'rate kifilete rosaano mereerinni balaxannosehu dino. Kifilete giddo rosiisaano xa'mo xa'mitanno woyte baalanta rosaano balaxxe anga kayissanno.

Qoltanno dawarono tashshi assitannote.

Konninni kainohunni Doongite rosiisaano baalanti baxxannosehura nabbabbanno maxaaffa uytanni ledde ledde jawaattanno gede assituse.

Rosiisaanosenna maatese assitannose irko Doongite dancha guma abbitanno gede lowo kakkaooshshe kalaqqinose. Baabba Doongite Ceekkatoti konni garinni jawaatte rossanni hakko dironni kifilete giddo deerra umikkita ikkite layinki kifile sa’u. Konnirano Rosu Mini afansha uynose. Annise Kalaa Ceekkatinna amase Baabba Baxiseno addinta hagiidhite haaro uddanna afanshaho hirtuse. Baabba Doongiteno hagiidhite rosoho qodhite ka’u. Baabba Doongite hakko garinni umikkita calla fultanni leyikki kifile iillitu.

Baabba Doongite leyikki kifile iillitinohu 1977 Maarote Dirooti. Hattenne yannara lee kifilera ‘Ministirete’ yinanni fonqolo uynanni. Doongite hakko diro, yaano 1977 Maarote Diro Leyikki kifileha ‘Ministirete’ fonqolo fonqolantu.

Baabba Doongite hakkonni fonqolira xibbunni xibbe abbite lamalki kifile sa'u. Lamalki kifile hakko rosi minenni suffe e'e rossu.

Baabba Doongite rosoho noose jawaante xaano badhera dihigginno. Lamalki kifilerano umikkita fulte sette kifile sa'u. Settikki kifilerano jawaantese addinta ledde 1979 Maarote Diro 'Ministirete' fonqolo adhitu. Settikki kifile fonqolirano addinta rooriidi guma abbite rosu mini su'ma woshshiishshu. Iseno rosu mini rosaano baalante mereerinni rooriidi guma abbite rooriidi ba'raa'ra afidhino.

Baabba Dongite Ceekkatiti umi dirimi rosi mine sayissu yannara kifilete roso calla dirossino. Doongite isiporte loosatennino egennantanni hadhu. Isipoortete mereerinnino kaasete godo'le lubbo fulte baxxannota ikkitu. Kaasete godo'lennino marawete (raasate) kaase roorsite baxxanno.


Baabba Doongite ontikki kifilera heedhe marawete (raasate) kaase danchu garinni godo'la hanaffino.

Baabba Doongite Ceekkatiti raasate kaase godo'lera leellishshanno jawaantenni maccata ikkitanni hadhu. Doongite rosu mine hanaffinota kaasete godo'le addi addi heeworano shiqqanni garosera dancha guma abbisiissanni keeshshitino. Baabba Doongite gujjaame ikkaseno tenne godo'le gaamaarrera dancha ba'raa'ra ikkinose. Daggino kaase hattenne leemmicho hojjasenni kubbite meenturo qolannohu dino. Ise meentanno kaase baala garosera guma kiirsiissanno.

Baabba Doongite raasate kaasera noose baxillinni kainohunni hawado sayissannohu roorinni kaase godo'litanniiti. Doongite qarqaru oosono gamba assite kaase godoshshiishshanni qajjeelshitanno. Qachise ooso hawado hakko garinni boohaartanni sa'anno. Baabba Doongite hattenne wedellichimmate noo yannara rosoho noose jawaantennino ikko kaasete godo'lesenni lowo manni afinose. Iseno konninni addintanni hagiirraamete.

Baabba Doongite ceekkatitera noose ajuuja rosisenni albira higge hadhe dancha deerra illa callate. Dancha ajuuja jeefo gantannokki gede bushuri mereero eannori dihooganno. Baabba Doongite 1979 Maarote Diro settikki kifile fonqolo fonqolante guma agadhite heedheenna rosose gufisannori mitturichi kalaqami. Doongite barra kaase godo'litanni hosse higganni noota mittu olluu beetti dii'rise. Dii're ba"annose woyte, "Roso'ya Bai Ane!" yitanni raartanna goshooshanni haadhe hadhannose.

Diidhuseri adhite ba'annore maala'linanni garinni giggishshineenna gattino. Baabba Doongite anni kalaa Ceekkati Baleelu dikkonni hawarrisi're higanni noohu aana haadhe massitu. Doongite "Iille"e! Iille!" yite raarteenna annisenna ledosi noo manni raarese macciishshe diidhinori anganni gane giggishshi. Hakkonni gedensaanniiti settikki kifile guma afidhe dii'runni massino masille habbu. Rososeno albira qolte suffu.



## Gafa Sase

**Baabba Doongite Ceekkatiti Lowiidi**

**Rosi Minnara**

Baabba Doongite Ceekkatoti settikki kifile rosi  
guma afidhuhu gedensaanni honsikki kifile rosose  
Irgaalamete Xaphoomu Layinki Dirimi Rosi Mine  
marte e'u. Baabba Doongite honsikki kiflenni kayisse  
tonaa-lame kifile geeshsha Irgaalamete Xaphoomu  
Layinki Dirimi Rosi Mine rosse guddino. Hakkiicho



keeshshitinohu 1980 Maarote Dirinni kayise 1983  
Maarote Diri geeshshaati.

Baabba Doongite Irgaalamete rossanni  
keeshshitinohu shoole dirooti. Togo yaano,  
honsikki kifilenni hanaffe tonna-layinki kifile guddu  
geeshsha hakkiicho keeshshitino. Tenne keeshshase  
giddoonnino, “Adhineemmo; dii’neemmo.” yaannohu  
dibaino. Baabba Doongite mito maaxantanni, mito  
mannaho qaxxartanni, mito kassassanni rosose  
keerunni guddino.

Baabba Doongite shoolenka diro rooriidi guma  
calla abbitanni gudde tonaa-laynki kifilera  
“Maatirike” fonqolantino. Maatiriketeno  
addinta dancha guma abbite 1984 Maarote Diro  
Addisaawu Yuniversite e’ino. Baabba Doongite e’ino  
yuniversitera hanafotenni kayisse baalante woggara  
dhaggeeffantanni guma abbitanni hadhino. Baabba  
Doongite ledose rossanno rosaanora mitoho maalale  
mitoho dancha faale ikkite sayissino.

Baabba Doongite yuniversitete giddo jaallaseranna wole rosaanorano dancha lawishsha ikkasenni naado afidhino. Doongite. Kifilete giddo, godo'lete xawira, saga'linanniwanna wolewano leellishshanno akatise rosicho aannoho. Baabba Doongite manni qoosso kisa dihasidhanno. Ise qoossono wolu manni kisasera wodhite dilaydhanno. Baabba Doongite konni garinni wole manna ayirrisse umise ayirrinyeno agadhite heedhanno manchooti.

Baabba Doongite yuniversitete roso konni garinni ha'runsita umi digirenni Suusunni maassante fultino. Addisaawu yuniversiteno afansha uyte maassiissinose.

Hakkunni gedensaanni mangistete looso duuchawa addi addiha loosu qeecha uyne gaammannase loossanni keeshshitino. Hakkonni gedensaanni rosose suffe rossara hasidhanni heedhe boode yanna rosu kaayyo afidhukki keeshshitino.

Ikkeennano, Baabba Doongite rosose suffe rosate hexxo dimudhitino. Loossanno loosi mini widoonni dagginota rosu kaayyo afidhe layinki digire roso rosate 2000 Maarote Diro Addisaawu Yuniversite galagalte e'ino. Baabba keeshshate batinyinni horontanni dishashshino. Hatte jawaantesenni laynki digirera Womaashshu Amadooshshi Roso rosse 2001 Maarote Diro maassantino.

Hakkonni gedensaanni mangistete looso agurte  
umise looso loosi'rate hedde qixxaawo assitanni  
keeshshitino. Layinki digirenni maassantuhu  
gedensaanni 2002 Maarote Dirinni Kayisse 2004  
Maarote Diri geeshsha sase diro calla Mangistete  
loosi aana keeshshitino. Baabba Doongite Ceekkatiti  
2005 Maarote Dirinni kayisse mangistete looso  
agurte Hawaasi Quchumi giddo umiseha daddalu  
mine fa'nitino. Baabba Doongite umi digirenni  
maassantanni heedhe mine assidhino. Tenne yannara  
hala'lado maate amadde ariise ledi heedhanno.  
Baabba Doongite xaa yannara shoole ooso amaati.

## Nabbawate Gedensiidi Xa'mo

Biddissa : Aante shiqqino xa'mo niwaawete garinni dawari.

1. Baabba Doongite ilantinohu hiittoo yanna giddooti?
2. Baabba Doongite rosisera gobbaanni maricho baxxanno?
3. Baabba Doongite settikki kifile fonqolo adhitinohu mamarooti?
4. Baabba Doongite Ceekkatiti honsikki kifilenni kayisse tonaalame kifile geeshsha rossinohu mamaati?
5. Baabba Doongite layinki digire rosase rosate hasidhanni heedhe rosu kaayyo hoogge keeshshitinohu mayira lawannohe?
6. Baabba Doongite daddalu mine fa'nase maaho kaa'litanno?

